

Optužnica protiv parlamentarca i bivšeg direktora



Prilikom akcije pripadnika SIPA u hotelu Tuzla

OSMANOVIĆ I TORIĆ UZELI MITO OD 20.000 KM

Od osobe uposlene na određeno vrijeme u Zavodu zdravstvenog osiguranja Tuzlanskog kantona, tražili i uzeli 20.000 KM, a kako bi riješili njen radni status

Tužilaštvo Bosne i Hercegovine jučer je podiglo optužnicu protiv Midhata Osmanovića, poslanika u Parlamentu Federacije BiH, i Velida Torića, bivšeg v.d. direktora Zavoda zdravstvenog osiguranja Tuzlanskog kantona, zbog uzimanja mita od 20.000 maraka.

Nezakonita korist

U optužnici je navedeno da su Osmanović i Torić u međusobnom dogovoru, zloupotrebom položaja ili ovlasti i nezakonitim posredovanjem, ostvarili nezakonitu imovinsku korist. Tereće se da su počinili kaznena djela protuzakonitog posredovanja i zloupotrebe službenog položaja.

- Oni se terete da su organiziranim i zajedničkim djelovanjem od jedne osobe uposlene na određeno vrijeme u Zavodu zdravstvenog osiguranja Tuzlan-

skog kantona, tražili i uzeli 20.000 KM kako bi riješili radni status i zaposlenje navedene osobe, saopšteno je iz državnog Tužilaštva.

Osmanović je uhapšen 25. decembra prošle godine nakon što je u hotelu Tuzla od jedne ženske osobe uzeo kovertu sa 20.000 maraka, te naredio optuženom Toriću da pripremi rješenje o zaposlenju ove osobe. Ubrzo je uhapšen i Torić, dok je novac oduzet.

- Kaznena djela počinjena u ovom predmetu predstavljaju primjer zloupotrebe službenog položaja ili ovlasti i korupcije, koja je otkrivena i spriječena odlučnom akcijom Tužilaštva BiH i SIPA, a o čemu je upoznata i javnost BiH, saopšteno je iz Tužilaštva.

Treba podsjetiti da su obojica uhapšenih bili kadrovi Stranke za BiH. Nakon hapšenja isklju-

čeni su iz ove stranke. Osmanović je bio jedan od najuticajnijih kadrova ove stranke u Tuzlanskom kantonu, te je zbog činjenice da je Stranka za BiH bila na vlasti u TK-u, odlučivao o mnogim imenovanjima na značajne funkcije. Njegovom zaslugom je i Torić imenovan na čelo Zavoda, koji ima godišnje prihode veće od 200 miliona maraka.

Pritisци i tužbe

Zanimljivo je da je Torić uhapšen samo mjesec nakon što ga je Čauševićeva vlada imenovala za v.d. direktora. Tada je smijenjen Hazim Rančić, uticajni kadar SDA. Rančić je u izjavi za naš list kazao da je on smijenjen nakon brojnih pritisaka, ali i nevjerovatne izmjene zakona po kojoj pravnik ne može biti direktor Zavoda, nego samo ekonomista i ljekar. Rančić je nakon toga tužio Vladu. **S. K.**